

# 敦煌本心王投陀經及法句經跋尾

陳寅恪

倫敦博物館藏敦煌寫本斯坦因第貳肆柒肆號佛爲心王菩薩說投陀經卷上一卷五陰山室寺禪師惠辯注及斯坦因第貳仟貳壹號佛說法句經一卷又巴黎國民圖書館藏敦煌寫本伯希和第貳叁貳伍號法句經疏一卷今俱刊入大正續藏疑似部中，寅恪取閱之，了無精義，蓋偽經之下品也。檢唐道宣大唐內典錄拾歷代所出疑偽經錄唐智昇開元釋教錄壹捌偽妄亂真錄同。載有

法句經兩卷。下卷寶明菩薩。

其寶明菩薩之語與此法句經所載符合，然則經文雖偽撰，而李唐初葉即已流行民間矣。

又白氏長慶集貳和元微之思歸樂詩云：

身委逍遙篇，心付頭陀經。

同集壹肆和微之夢遊春詩結句云：

法句與心王，期君日三復。

自注云：

微之常以法句及心王頭陀經相示，故申言以卒其志也。

寅恪昔日讀白詩至此，以未能得其確詰爲憾，今見此佚籍，始知白詩之心王頭陀經即敦煌寫本之佛爲心王菩薩說投陀經，至其所謂法句經即敦煌寫本之偽法句經，復是一偽書，而非今佛藏所收吳晉以來相傳之舊本也。特爲記之，以告同讀香山詩者，此或亦今日老嫗之所不能解者歟？